

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1928 del 10/07/2025

Dar summar in ummaz von pestn lentla von Beleschlánt: Ai zo leba kultùr, zung un stòrdja

Haus von Prükk, Pinakothek Pedrazza un Forte Wèrk Lusérn: 'z tüanda offe di auzlegom vo Lusérn

Forte Wèrk Lusérn, Haus von Prükk un Pinakothek Rheo Martin Pedrazza: 'z soins dise di auzlegom vo Lusérn, boda von 14 von prachant hãm offegetânt di tür in turìstn vor da summar stadjóng 2025. Ûnsar lentle voalt asó eppaz mearar, nãmp dar raichen auzstèllung von Museo Lusérn, offe alle tage von menta 21 von abrél fin atz 2 von bintmãnat 2025.

“Balda rift dar prachant, di schualn spèrn un da schümma stadjóng khint - khütta dar diretór von Kulturinstitut Lusérn Willy von Polèz -, 'z lânt heft bidar å zo leba. Ûsarne auzlegom kontàrn alle djar att tausankhar turìstn, bazza nèt bizzan vodar zimbar mindarhait, von traditzióngen vo soinen laüt un vo soinar zung”.

'Z Haus von Prükk bortet vonan altz haus, boda nã haüt zoaget bida soin gest di haüsar von djardar '800. Gemacht vo zboa haüsar ågehenk pittnãndar, di auzlegom geat von stall aubart, fin zo riva in khuchln un in slafkhãmmarn von zboa quartìarn von XIX un von XX djarhundart, zbisnen sachandarn genützt alle tang un struméntn vodar arbat von sèlln zaitn.

Bintsche bait von Haus von Prükk venntma di Pinakothek Rheo Martin Pedrazza, pinn 35 pildarn geschénkht von künstlar, gebortet atz Lusérn in djar 1924, pittnãndar pitt soin vatarhaus. In drain saln makma seng disénje un pildar gemacht nã dar künstliche untarsuchung, boda hatt nia vorgèzst di huamat, Lusérn.

Nèt zo vorgèzza dar Forte Wèrk Lusérn, ummadar von gröazarstn von austroungarischar raich zbisnen Folgràit un Vesan, augemacht von djar 1908 fin in djar 1912. Nidargelekk attn Kãmp, hoach 1549 m, attn Wèrk Lusérn makma rivan zo vuaz, gianante nã in umman von tematischen staigela, boda zoaget bia di spurn von kriage hãm gebèkslt daz khlumma lânt vo Lusérn un soi kamòuschaft. Haür, pròpio attn Wèrk Lusérn, bartma mang seng da nãuge auzlegom vo pildarn “Donne in Guerra”: an auzstèllung gemacht von MITAG, boda ågeat di baibar in di zait von earst Bèltkriage.

Zo vaira da nãuge stadjóng boda åizgeheft, atz 14 von prachant, in setz von Kulturinstitut, izzese gehaltet di vorstèllom von libar “Ferito, morto, sepolto. Strutture sanitarie e cimiteri militari sugli altipiani di Folgaria, Lavarone e Vezzena”, geschribet von taütsch autór Rolf Hentzschel. Dar abas iz gest an okkasióng zo gedénkha bazzez iz gest 'z kriage un di toatn bo 'z hatt hintargelatt, 110 djardar spetar azta iz auzgeprocht daz earst Bèltkriage.

Dar Forte Wèrk Lusérn, 'z Haus von Prükk un di Pinakothek Rheo Martin Pedrazza soin offe alle tage fin an sunta 7 von herbestmãnat un darzuar di sãntza un di sunta von 13-14, 20-21 un 27-28 von herbestmãnat. Zo bizzasan mearar un zo khoava di bildjétn makma gian atti websait von Museo Lusérn odar von Kulturinstitut Lusérn.

(eng)